


Contrario na loke Joran a declara na Hulanda ayera
Si Ministerio Publico gana e apelacion,
Joran vd Sloot tin cu bin bek Aruba
Y sigui cu su detencion aki na KIA mes



ORANJESTAD – Na su yegada na Hulanda diamars, contrario cu loke e no a haci na Aruba, Joran vd Sloot a papia cu prensa Hulandes. Tabata na su salida for di Schiphol

cu prensa Hulandes a acerca e hoben aki y haci e algun pregunta. Un di e contestanan cu mas a hala atencion ta esun cu Joran ta bisa cu si e wordo persigui legalmente, esaki

awor lo tin cu tuma lugar na Hulanda.

CASO NA ARUBA

Bon Dia Aruba a compronde for di Ministerio Publico cu contrario na e declaracion di Joran vd Sloot na Hulanda, cu e lo tin cu continua cu su caso aki na Aruba mes. Como ehempel a duna, cu si hues den apelacion dicidi cu e ta haya necesario pa Joran continua cu su castigo den prison debi cu tin motibonan nobo pa esaki, e tin cu bolbe Aruba y continua cu su castigo aki na Aruba y no por haci esaki na Hulanda.

KI ORA SI POR

Ta solamente si hues dicta un sentencia despues cu e caso mes tuma lugar y a haci un peticion pa overplaatsing pa Hulanda, cu Joran (si e wordo haya culpabel) lo por sinta su eventual castigo na Hulanda mes en bes di Aruba. Pero no ta asina cu e hecho cu e ta na Hulanda awor pa studia, ta pone cu si e tin cu dreña prison pendiente e caso, cu e por haci esaki na Hulanda mes, pa motibonan logistico. E lo tin cu biaha pa Aruba pa continua cu esaki.

Durante un caso sumario dialuna atardi mes,
Ministerio Publico a purba
para Joran vd Sloot di biaha
pa Hulanda

A perde e caso y e apelacion riba mesun dia!!!

ORANJESTAD

Ministerio Publico dialuna a trata na impedi Joran vd Sloot di biaha pa Hulanda, pero no tabata exitoso den esaki. Tabata dialuna atardi cu Ministerio Publico a haya sa di e biahe aki di vd Sloot pa Hulanda, unda cu nan a entama un caso sumario pa para esaki, pero no a logra. Un apelacion mesora tampoco a duna su fruto, cu resultado cu Joran vd Sloot a logra biaha pa Hulanda y a yega ayera mainta.

PRESENTA PA INTEROGACION

E tres sospechosonan Satish y Deepak Kalpoe, hunto cu Joran vd Sloot cu a wordo laga den libertad door di hues comisario diasabra ultimo, a haya peticion di e team investigativo pa presenta serca polis pa mas interrogacion. Esaki manera hues a stipula, cu an mester tabata disponibel pa e investigacion.

RUMANNAN KALPOE

E rumannan Kalpoe a presenta voluntariamente dialuna pa asina polis por a haci nan mas pregunta. E

di t es sospechoso a wordo puntra pa presenta na polis pero ayera diamars dia 6 di september.

CASO SUMARIO

Pero tabata den oranan di dialuna merdia cu Ministerio Publico a haya sa cu vd Sloot tabata bayendo Hulanda e mesun anochi di dialuna 5 di september. E mesun merdia Ministerio Publico a cuminsa un caso sumario serca hues comisario pa evita esaki y tambe pa hues comisario duna vd Sloot un orden pa pone su mes disponibel pa mas interrogacion den e caso.

PERDE APELACION

E peticion di Ministerio Publico a wordo rechasa door di hues comisario. Despues di a haya e decision di hues comisario. Despues di a haya e decision di hues comisario, Ministerio Publico a apela esaki. Den apelacion tambe e peticion pa evita vd Sloot bai Hulanda y e peticion pa duna e sospechoso un orden pa pone su mes disponibel pa mas interrogacion den e caso a wordo rechasa door di Corte Superior.